

Allannguutissatut siunnersuut

uunga

Uunga siunnersuut: Ilageeqarneq pillugu Inatsisartut inatsisaannik allanngortitsineq pillugu Inatsisartut inatsisaat nr. xx, xx. xxx 2018-imeersoq

(Ajoqinik aamma pattattunik ilinniartitaanernik aaqqissuussinerit, oqaluffimmut pulaarnermut akiliuteqartitsisarneq aamma nipangiusimasassanik ilisimatitseqatigiiffiusumik oqaaseqaatissanullu tunngasunik il.il. ataatsimiittarnerit pillugit)

Aappassaaneerinninnermut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamit saqqummiunneqartoq.

Qulequtaaraanut

1. Qulequtaraa ima oqaasertaqassaaq:

”(Ajoqinik aamma pattattunik ilinniartitaanernik aaqqissuussinerit aamma nipangiusimasassanik ilisimatitseqatigiiffiusumik oqaaseqaatissanullu tunngasunik il.il. ataatsimiittarnerit)”

§ 1-imut

2. § 1, nr. 9-10, atorunnaarput.

Inatsisissatut siunnersuummut nassuiaatit

Nalinginnaasumik nassuiaatit

Allannguutissatut siunnersuutip malitsigisaanik oqaluffimmut pulaarnernut naalagiat avataanniittunut akiliuteqartitsisarneq pillugu inatsisissatut siunnersuummi aalajangersagaq (§ 1, nr. 9) atorunnaarpoq.

Tamatuma kingunerisaanik siunnersuutip malitsigissavaattaaq inatsisissatut siunnersuummi § 1, nr. 10-p (akiliutit taakku angissusissaat akiligassiissutigineqartarnerallu pillugit malittarisassiorsinnaanissaanissamut tunngavissap) atorunnaarnera.

Kiisalu allannguutissatut siunnersuutip malitsigissavaa inatsisissatut siunnersuummut qulequtaaqqap malitsit iluarsineqarnera, qulequtaaqqamit ”oqaluffimmut pulaarnermut akiliuteqartitsisarneq” peerlugu.

Allannguutissatut siunnersuutip saqqummiunneqarneranut tunuliaqutaasut eqqarsaatigalugit, inatsisissatut siunnersuutip aappassaaneernejarnissaanut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap isumaliutissiissutaa innersuussutigineqarpoq.

Ataatsimiititaliap isumaliutissiissummini ilaatigut erseqqissarpaa Kalaallit Nunaanni ileqqorigipput oqaluffiup tamanit katersuuffiusarnera – oqaluffiup ammasuunera. Oqaluffivut upperisarsiornikkut, anersaakkut inuttullu naapiffiupput tamatumalu saniatigut oqaluttuarisaanitsinnut inuiaqatigiittullu pingaartitsinnut nalunaqutaallutik. Ataatsimiititaliaq taamaattumik isumaqarpoq oqaluffik tamanut ammasuusariaqartoq, inuiaqatigiussutsitsinnik oqaluttuarisaanitsinnillu paasisaqarumasut maani najugaqaralarpata takornariaagaluarpataluunniit.

Taamaattumik naalagiarnerit avataasigut pulaarnerit akilersinneqartalissappata, tamanna oqaluffiup suuneranik suusariaqarneranillu tunngaviummik paasinninnermut tamatumunnga ataqatigiissikkuminaatsutut isikkoqarpoq.

Naak akiliuteqartitsisarnermit isertitat siunertamut nersornartumut atorneqartussaagaluartut, akiliuteqartitsisalernissamik siunnersuutaaqqaartoq ilagiinnik pulaartunillu aamma pissutissaqalersitsinnaagaluarpoq allakkat illernartut soorlu Matiusip iivangiiliuani 21:31-ip eqqarsaatigeqqissaarnejarnissaannut. Taamatut eqqarsaatiginneqqissaarnerit anersaakkut pisuunnguallaataasinnaapput, kisiannili aamma matumanisorpiaq allatut isumaqartinneqarsinnaallutik, ilagiit soqutigisaattut oqaatigineqarsinnaanngitsunik.

Allannguutissatut siunnersuut, inatsisit atuuttut tunngavigalugit pissutsit eqqarsaatigalugit, aningaasatigut allaffissornikkulluunniit kinguneqassanngilaq.

Inatsisissatut siunnersuummut Naalakkersuisunit saqqummiunneqartumut sanilliullugu, allannguutissatut siunnersuut isertitassaagaluanik annasaqarnermik kinguneqassaaq. Isertitassat taakku qanoq amerlatiginissaat inatsisissatut siunnersuummut nassuiaatini missingerniarneqarsimanngilaq. Isertitassalli amerlannginnissaat naatsorsuutigineqartariaqarsorinarpoq, aningaasaliissutini allannqortitsisoqarnissaa inatsisissatut siunnersuummi naatsorsuutigineqanngitsoq inatsimmut nassuiaatini ilisimatitsissutigineqarmat.

Inatsisissatut siunnersuummi aalajangersakkanut ataasiakkaanut nassuiaatit

Nr. 1-imut

Allannguutissatut siunnersuutip malitsigissavaa inatsisissatut siunnersuummut qulequtaaqqap allanngortinneqarnera, qulequtaaqqamit ”oqaluffimmut pulaarnermut akiliuteqartitsisarneq” peerlugu. Tamanna malitsitut iluarsiieneruvoq.

Nr. 2-mut

Allannguutissatut siunnersuutip malitsigisaanik inatsisissatut siunnersuummi § 1, nr. 9 atorunnaarpoq, taamalu oqaluffimmut pulaarnernut naalagiat avataanniittunut akiliuteqartitsisarnernut inatsisitigut tunngavissaqassanani.

Tamatuma kingunerisaanik siunnersuutip malitsigissavaattaaq inatsisissatut siunnersuummi § 1, nr. 10-p atorunnaarnera. § 1, nr. 10-kkut akiliutigineqartut akilersinnissaannut akiliutillu annertussusissaannut biskoppi isumaqatiginiareerlugu malittarisassiornissamut Naalackersuisunut piginnaatitsissut atuuttoq annertusineqarpoq, oqaluffimmut pulaarnernut naalagiat avataanniittunut akiliuteqartitsisarneq ilaasussanngorlugu. Taamaalilluni malitsitut iluarsiiissuteqarneq matumani pineqarpoq.